

四庫全書

集部

欽定四庫全書

集部

吳郡文粹續集卷四十六

七

詳校官庶吉士_臣朱理

侍讀_臣孫球覆勘

總校官進士_臣繆琪

校對官監丞_臣張魯炳

謄錄監生_臣李錦

欽定四庫全書

吳都文粹續集卷四十六

明 錢穀 撰

雜文

蘇州刺史謝上表

白居易

臣居易言伏奉三月四日恩制授臣使持節蘄州諸軍事守蘇州刺史以刺史臣某月二十九日發東都今月五日到州當日上訖時當明盛寵在藩條祇命荷恩以感以懼臣某誠歡誠幸稽首頓首伏惟皇帝陛下嗣膺

歷數重造震區將至昇平在先政化詢求牧守勤恤黎元實陛下惟良之秩責成共理之日也臣以微陋早忝班行前自中書舍人出為杭州刺史幸免敗闕實無政能已蒙寵榮入改宮相今奉恩寄又分郡符獎飾具載於詔中慶幸實生於望外况當今國用多出江南江南諸州蘇為最大兵數不少稅額至多土雖沃而尚勞人徒庶而未富宜擇循良之吏委以撫綏豈臣瑣劣之才合當任使然既奉成命敢不誓心必擬夕惕夙興焦心

苦節惟詔條是守唯人瘼是求論陛下憂勤之心布陛下慈和之澤則涵育之下疲人自當感恩而歲時之間微臣或希報政塵瀆皇鑒吐露赤誠寵至空驚恩深未答無任慚惶懇激之至謹差軍事散散將某乙奉表陳謝以聞臣某誠惶誠恐稽首頓首謹言

蘇州謝上表

劉禹錫

臣某言伏奉制書授臣使持節蘇州諸軍事守蘇州刺史始從郎署出領郡章承命若驚省躬增感伏惟皇帝

陛下受上玄之眷祐揚列聖之耿光大康黎元慎擇牧
守德音每發品物咸蘇臣本書生素無黨援謬以薄伎
三登文科德宗皇帝擢為御史在臺三載例轉省官永
貞之初權臣領務遂奏錄用並聞虛名唯守職業實無
朋附竟坐飛語貶在遐藩憲宗皇帝後知事情却授刺
史凡歷外任二十餘年伏遇陛下應運重光物無廢墜
收拾耆舊塵忝班行既幸逢時常思展効在集賢院四
換星霜供奉新書二千餘卷儒臣之分甘老於典墳優

詔忽臨又委之符竹分憂誠重戀闕滋深石室之書空
留筆札金閨之籍已去姓名本末可明申雪無路豈意
聖慈弘納不隔卑微面辭之日特許升殿天顏咫尺臣
禮兢惶不敢盡言空懷誠懇謝恩而出生光於九陌之
間受訓而行布政於五湖之外臣即以今月六日到任
上訖伏以水寔之後物力索空臣謹宣皇風慰彼黎庶
臣聞有味之物蠹魚必生有才之人讒言必至事理如此
古今同途了然辨之惟在明聖伏惟陛下察臣此言則

天下之人無不幸甚江海遠地孤危小臣雖雨露之恩
幽遐必被而犬馬之戀及親為榮

蘇州謝賑賜表

臣某言伏奉去年三月十五日敕蘇州宜賜米一十二
萬石委刺史據戶均給者恩降九天澤流百姓伏以臣
當州去年災沴尤甚水潦雖退流庸尚多臣前月到任
奉宣聖旨闔境老幼無不涕零詢訪閭里脩知凋瘵方
據事實以便奏論聖慈憂人照燭幽遠特有賑卹救其

災荒蒼生荷再造之恩歎歲同有年之慶臣忝為長吏
倍萬常情無任感激忉躍之至

蘇州韋中丞自代狀

蘇州狀上中書門下諸道鹽鐵轉運使江淮留後朝議
郎守太僕少卿兼御史中丞上柱國賜紫金魚袋韋應
物右臣蒙恩授蘇州刺史伏準建中元年正月五日制
刺史上後舉一人自代者前件官歷務皆有名執心不
回臨事能斷今預職雖重本官尚輕伏以當州者口賦

首出諸郡况經災沴切在撫綏尚省無能輒敢公舉司
權筦之利誠藉乎才流豈弟之風以維邦本非敢臆說以
塞詔書今具奏聞

蘇州上後謝宰相狀

朝議大夫使持節蘇州諸軍事守蘇州刺史上柱國劉
某石某今月六日到州上訖某山東一書生潦倒踈濶
在少壯日猶不逮人况今衰遲智力愈短相公哀憐不
遇擢授名邦實荷弘獎慚非令器伏以當州繇大祲之

後物力蕭然飢寒殞仆相枕於野誓當悉心條理續具
奏論才術素空憂勞方始懼無聞問忝負恩知不任瞻
望懇迫之至

蘇州加章服謝宰相狀

右某素乏吏才謬居劇郡以無庸之器當難治之時恭
守教條勤求人瘼伏以聖德柔遠皇明燭幽凡具上陳
皆可具奏遂令管見得及疲黎自承雨露之恩非有循
良之政猥蒙朝獎特降命書顧遙掖之腐儒披華章之

貴服有黻黻明之典誠招彼其之譏限以官守不獲拜謝
瞻望榮感心魂載馳

蘇州謝恩賜加章服表

臣某言伏奉去年十一月二十七日詔書加臣賜紫金
魚袋餘如故者恩降重霄榮霑陋質虛黻黻明之典恐
興彼其之詩寵過若驚喜深生懼中謝臣起自書生業
文入仕德宗朝為御史以孤貞在臺順宗朝為郎官以
緣累出省憲宗皇帝浸知其寃特降赦書追赴京國緣

有虛心稱居清班務進者爭先上封者潛毀巧言易信
孤憤難伸俄復一麾外轉三郡伏遇陛下膺期御宇大
振淹滯哀臣宿舊猥見收拾職兼書殿官忝儀曹微勞
未宣薄命多故又離署省重領郡符延英面辭親承教
誨銜命即路星言載馳到任之初便逢災疫奉宣聖澤
恭守詔條上稟睿筭下求人瘼才術雖短憂勞則深幸
免流移漸臻完復皆承聖化所及遂使人心獲安豈由
微臣薄劣能致臣素乏親黨家本孤貧年衰無酒食之

娛性拙無博奕之藝自領大郡又逢時災晝夜苦心飲食忘味曾經誣毀每事防虞唯託神明更無媒援豈期片善上達宸聰回日月之重光燭江湖之下國絲綸褒異苦節既彰印綬煒煌老容如少望雲天而拜舞豈盡丹誠視環玦以徘徊空嗟白首無任感激屏營之至

蘇州謝就除禮部員外郎充天章閣待制表

范仲淹

臣某言伏蒙聖恩特授臣前件官充職者渙渥自天震

惶無地改中臺之華序進內閣之清班盡出高明殊登
秘近臣中謝竊念臣發自顏巷賓於舜門一第為榮四
方無効爰自書林預選柱籍升華恥汨沒以懷安或感
激而論事惟慕古人之節詎希英主之知伏惟皇帝陛
下稟帝堯之聰明加漢高之豁達坦聖懷而虛受期鴻
化以咸孚念三聖之艱難而成丕業求七人之蹇諤以
補大猷臣獨愧非才首當清問危言多犯孤立自持斧
鉞居前雷霆在上敢避樞機之禍終垂藥石之良陛下

日月垂光江海等量恕其萬死假之一麾望已絕於青
雲谷未更於鴻霈俄易藩宣之寄寧分旰昃之憂忽降
綸章薦加寵數而況闢圖書之府竊處於深嚴踐雲龍
之庭當脩於顧問非名儒而不稱豈曲士之能堪矧遭
清曹仍居舊治輝榮大集志願何求敢不內守樸忠外
脩景行進退惟道遵聖賢視履之方終始一心副君父
育材之造臣無任云云

知平江府謝表

孫觀

詔紱疏恩忽返南遷之後囊封避寵又分東顧之憂擢
升內閣之華增重全吳之寄中謝伏念臣憑愚護短見
謂禍衷觸情妄行自作奇禍厚誣若此一死何逃尚寬
東市鈇鉞之誅永畀南海蟲蛇之侶仰止覆盆之照俯
矜種豆之冤投豺遽屏於遠方敗履再升於華幄豈堪
老退治筆硯於西垣止欲歸休挂衣冠於神武純誠備
罄全度務從猥分刺史之符再列從臣之托心勞政拙
已憂魏狄之不容寢愕夢驚可見吳牛之尚喘茲蓋伏

遇皇帝陛下聖謨天縱盛德日新炎正中微肇光武興王之業小雅盡廢賡周宣撥亂之詩深念三吳利敝之餘改畀千里藩宣之重究其老矣自惟無益於縣官卧而護之尚欲兼安夫民吏

龍圖閣學士再知平江府謝表

內閣寶儲促上遽嚴之直全吳巨屏叨居方面之崇欣逢白首之遺民還復青氈之舊物恍如昨面祇忝明恩中謝伏念臣涉世濶踈空慚情學逢辰休顯浸冒官榮

獨荷三朝識拔之恩偏塵兩禁高華之選分符海上漸
收遲暮之身改命吳中又玷藩維之重追尋陳迹宣布
寬條千里江山不改承平之觀四隣雞犬一空盜賊之
餘閭里呻吟田萊蕪沒攀金城之柳衰病何以堪之訪
元都之桃飄零殆無存者茲蓋伏遇皇帝陛下官人作
哲厚下施仁俯憐簪履之遺加惠桑榆之晚撫三江之
壤悼靈光之獨存矜一介之臣望神山而已遠幸擢官
於小郡早沐輝榮旋移牧夫通都彌慙保障從此撫綏

凋瘵申畫封圻虎頭食肉猶妄意於古人馬革裹屍庶
捐軀於異日

辭顯謨閣待制知平江府狀

臣資稟蠢愚數忤權要一遭誣陷遂寘嚴科負天下之
至寃犯人臣之大惡始則州縣觀望發卒圍守至持挺
擊析以衛終則羣盜入室指為奸細又探囊胠篋而趨
妻子流離兄弟奔散暴露野次不知存亡疾病呻吟日
與死迫遽叨嚴詔俾還禁垣削罪籍於城旦之春收舊物

於從臣之索問閭驚嘆弛拘維之禁交親改觀通問遺
之書痛定之餘恍如隔世理宜扶憊奔走造朝而積憂
薰心形羸骨立負薪有疾力難強於馳驅俟駕而行罪
不容於逋慢忱辭上扣全度矜從擢之次對清切之塗
畀以方郡承宣之寄重惟涼匪彌積兢皇卧漳濱之疴
尚未逃於鬼責冒鵠梁之刺必又致於人言伏望聖慈
收還成命俾安田里以保餘生雖嘗膽卧薪莫追往咎
謬當叩轅擊壤以俟太平

張正甫蘇州刺史制

白居易

浙右列城吳郡為大地廣人庶舊稱難理多選他郡二千石之良者轉而遷焉鄧州刺史張正甫自領南陽僅經三載廣平清簡以臨其人人安政和治行第一宜以大郡推而廣之用旌前勞且佇來効可蘇州刺史

賜工部尚書浙西江東制置使兼江西安撫大使知平江府文天祥詔

朕未堪多難疆圉孔棘御史罔不曰艱惟時魁儒秉忠

倡義獎率三軍入衛社稷國勢為之增重人心恃以為
安精神折衝文武是憲卿器度才猷克邁前哲惟長江
之險要未復畿甸之守脩當嚴卿以太常伯兼領二使
表裏撐拓以固吾圉東西運掉以清寇氛儒帥一臨士
勇百倍用保乂我文祖受民茲惟豐芑貽謀之意虔共
綏靖紆朕宵旰之憂勤所辭不允正言曾唯奏吳門與
區今為邊地掄魁雋望忠孝勤王軍中喧騰小范甲兵
之謠河上尚稽光世節制之命德裕元年八月二十七

曰

工部尚書兼都督府叅贊軍事浙西江東制置
使兼江西安撫大使知平江府事文天祥除端
明殿學士制

敕元戎十乘先行式倚真儒之望師中三命承寵適降
方面之權朕若稽先朝之舊章最重承明之選職內以
傳畿廷之彥外以褒師閭之賢王素之牧平涼程勣之
泣益都皆膺茲選今得其人具官文天祥實學濟時英

猷緯國文有武備義槩質於神明儒知軍情忠忱貫於
霜日傳檄召兵而志士奮纓冠赴難而國勢張不負素
定之謀允為寡二之傑翰蕃咨爾修扞疆宇命爾攘除
予欲壯浙西之略予欲復江表之封將聳前茅之令軍
成破竹之威惟任之專者位必崇惟名之至者功必集
乃躋班規殿之峻以增華帥闡之嚴噫邦咸喜戎有良
翰茂對陟明之渥身雖外心在王室趣成敵愾之勲

德祐元年九月十六日賜端明殿學士浙西江

東制置使知平江府事文天祥手詔

詔曰卿秉忠忱以濟時難倡義旅以衛王室經營四方如召虎獎率三軍如武侯爰始常伯之英趣奮制閫之寄將士用命遂迅掃於寇氛精神折衝益振揚於勝氣有嘉體國之志亟奏克敵之勲元戎啓行周邦咸喜載加錫賚式示眷懷今賜卿金二十兩注盃一副金十五兩盤盞一副細色二十匹纈羅二十匹龍涎香三十餅度金香盒一具十兩清漉香三十帖龍茶十觔至可領

也故茲札示具體吾倚注之至意

胡琴婢勝兒

出宋无吟嚙集

吳俗祈恩泰伯祠爭圖輿馬獻新奇文王三讓周天下
翻愛胡琴寵勝兒

吳泰伯祠在閭門之西每春市人相率牲醴多圖善
馬綵輿美女以獻飾以金銀復以輕綃畫侍婢捧胡
琴以從其貌勝於舊繪者名之為勝兒蓋他獻者無
以為匹也女平方舞有進士劉景復送客之金陵置

酒於廟東通波館忽欠仲思寢夢紫衣冠者言曰讓
王奉屈劉生隨至廟周旋揖讓而坐王語劉生曰適
納一胡琴妓藝精而色麗知吾子善歌故奉邀作胡
琴一曲以寵之生初不酣命酌人間酒一杯已醉乃
作歌曰繁絃已停雜吹歇勝兒調弄邈娑撥四弦攏
撚三五聲喚起邊風對明月大聲嘈嘈奔涇涇浪蹙
波間倒溟渤小弦切切怨且咽鬼哭神悲秋蟋蟀側
腕斜挑掣流電春雷直戛騰秋鶴漢妃徒得端正名

秦女虛誇有仙骨我聞天寶十年前梁州未作西戎
窟纖歌妙舞揚昇平不省烟塵遽蓬壚太平之末兵
戈興汗血奔騰恣唐突玄宗未到萬里橋東洛西京
一時沒海內臣民皆鼎沸飲恨吞聲空咽嗚時看明
月望青天怨氣冲星成彗孛國門之西八九鎮高城
深壘閉閒卒河湟咫尺不能收挽粟推車寧復卹今
朝聞撥梁州曲使我心神暗超忽勝兒若得邊塞彈
征人血淚應闌干吟畢以獻王呂勝兒授之王之侍

兒有妬者以金如意擊勝兒劉生驚而寤歌傳於吳
中

王敬伯歌宛轉歌二首

唐郎

風已清月朗琴復鳴掩抑悲千態慙慙是一聲歌宛轉
宛轉和且長願為雙鴻鵠比翼共翱翔

日已暮長簷鳥應度此時望君君不來此時思君君不
顧歌宛轉宛轉那能異棲宿願為形與影出入恒相逐

同前二首

劉方平

星參差月二八燈五枝黃鶴瑤琴將別去芙蓉羽帳惜
空垂歌宛轉宛轉恨無窮願為波與浪俱起碧流中

曉將近黃姑織女銀河盡九曲錦衾無復情千金寶鏡
誰能引歌宛轉宛轉傷別離願作楊與柳同向玉窻垂

同前

江總

九夕天河白露明八月濤水秋風驚樓中恒聞哀響曲
塘上復有辛苦行不解何意悲秋氣直置無秋悲自生
不怨前階促織鳴偏愁便路擣衣聲別燕差池自有返

離蟬寂寞詎含情雲聚含情四望臺月冷相思九重觀
欲題芍藥詩不成來采芙蓉花已散金尊送曲韓娥起
玉柱調絃楚妃歎翠眉結恨不復開寶鬢迎秋更全亂
湘妃拭淚灑貞筠藥浣衣何處人步步香飛金薄屐
盈盈扇揜珊瑚唇已言採桑期陌上復能解珮就江濱
競入華堂安寶枕爭開羽帳奉華茵不惜獨下眼前鈞
欲許便作後來新後來暝暝同玉牀可憐顏色無比方
誰能巧笑特窺井乍取新聲學繞梁宿處留嬌墮黃珥

鏡前含笑弄明璫採葩摘心心不盡
茱萸折葉葉更芳
已聞能歌洞簫賦詎是故愛邯鄲倡

宛轉行

張籍

華屋重翠幄綺席雕象牀遠漏微更疎
薄衾中夜涼
爐氲暗徘徊寒烟背斜光妍姿結宵態
寢僻幽夢長
宛轉復宛轉憶憶更未央

王敬伯歌

李端

妾本舟中客聞君江上琴
君初感妾嘆妾亦感君心
遂

出合歡被同為交頸禽傳杯惟畏淺接膝猶嫌遠侍婢
奏瑩篴女郎歌宛轉宛轉怨如何中庭霜露多霜多葉
可惜昨日非今夕徒結萬里懽終成一宵客王敬伯淥
水青山從此隔

同前

高啟

舟初維琴始薦驛亭邊夜相見歌宛轉情綢繆解環珮
彈瑩篴歌易闌情難歇江波寒墮明月綠壺再傾芳音
欲違辟彼林鳥逢晨各飛羅衣沾霜城烏忽起明日相

思孤棹千里

同前

周南老

舟泊通波亭琴調離鶯聲美人忽相見感此琴中情侍
婢出瑩篴低回絃始更扣金歌宛轉意慘琴復清贈以
白玉瓜月落蓬窻明少年怪夢作端由起心兵

王敬伯事見前集

杜蘭香下嫁張碩

宋邕

天上人間兩渺茫不知誰識杜蘭香來經玉樹三山遠

去隔銀河一水長，怨入清塵愁錦瑟。酒傾玄露醉瑤觴，
遺情更說何珍重。擘破雲鬟金鳳凰。

張碩寄杜蘭香

碧落香銷蘭露秋，星河無夢夜悠悠。靈妃不降三清駕，
仙鶴空成萬古愁。皓月隔花追嘆別，飛烟籠樹省淹留。
人間何事堪惆悵，海色西風十二樓。

墉城仙錄云：初，漁父於洞庭之岸，聞兒啼聲，四顧無人，
惟有三歲女子在岸側。漁父憐而舉之，十餘歲，天

姿奇偉靈顏珠瑩殆天人也忽有青童靈人自空而
下來集其家攜女而去將升天謂漁父曰我仙女杜
蘭香也謫於人間吳建興二年復降包山張碩家有
侍婢二人大名萱枝小名松枝贈碩詩曰河母處靈
嶽時遊雲霄際衆女侍羽儀不出墉宮外飈輪送我
來豈復處塵穢從我與福俱嫌我與禍會乃出薯蕷
子三枚大如雞子云食此令君不畏風波辟寒暑碩
問禱祀如何香曰消摩自可除疾淫祀何益消摩謂

藥也既成婚授以舉形飛化之道香便絕迹不來年
餘碩閒行忽見香車於山之際驚喜徑往造香欲登
其車其奴舉杆之遂退

聞在西洞庭
莫詳其處

玉波冷雙蓮

高啟

金風暮剪雙頭藥啼臉辭秋嬌血紫宮女三千罷笑喧
錦雲陣冷鴛鴦死滿江烟玉流名香尋魂弔影愁茫茫
吳天墜露衰紅濕一夜波涼小龍泣

同前

周南老

涼月墮玉波露泣雙蓮冷
瑣窗開洞門虛落冰簾影
美人久延佇盈盈素粧靚
酒進珊瑚鍾神游蓬海境
倚曲歌未終不知秋夜永
折得並頭花猶思在烟艇

芷秀葯花

芷即葯也香草出吳中者佳

高啟

春香上羅襦暗引蘭橈渡
蝶散拚紅房王孫歸已暮
斜條拂蛾鬢采擷同芳杜
脈脈烟雨濃江皋斷腸路

同前

周南老

芷秀雜蘭佩葯華出雲房
春露發芳采晴曛散麝香
我

我水晶簪舉舉雲霓裳抽簪瑤盤擊扣節歌樂章殷勤
贈素綃日射生輝光回首馮夷宮颯然風雨涼

唐處士李羸夜遊震澤逢女郎為歌玉波冷雙蓮之
曲曰此哀吳宮二隊長之詞又歌其所製並秀約華
之曲益龍女云二曲世皆不傳余戲為補之

秦娘歌

并引

劉禹錫

秦娘本韋尚書家主謳者初尚書為吳郡得之命樂
工誨之琵琶使之歌且舞無幾何盡得其術居一二

歲攜之以歸京師京師多新聲善工於是又捐去故
技以新聲度曲而秦娘名字往往見稱於貴遊之間
元和初尚書薨於東京秦娘出居民間久之為蘄州
刺史張繇所得其後繇坐事謫居武陵郡繇卒秦娘
無所歸地荒且遠無有能知其容與藝者故日抱樂
器而哭其音焦殺以悲雒客聞之為歌其事以足於
樂府云

秦娘家本閭門西門前綠水環金堤有時粧成好天氣

走上皋橋折花戲風流太守章尚書路旁忽見停隼旗
斗量明珠鳥傳意紺懷迎入專城居長鬟如雲衣似霧
錦茵羅薦承輕步舞學驚鴻水榭春歌撩上客蘭堂暮
從郎西入帝城中貴遊簪組香簾櫳低鬟緩視抱明月
纖指破撥生朔風繁華一旦有銷歇題劍無光履聲絕
洛陽舊宅生草萊杜陵蕭蕭松柏哀粧奩蟲網厚如繭
博山爐側傾寒灰蘄州刺史張公子白馬新到銅駝里
自言買笑擲黃金月墮雲中從此始安知鵬鳥座隅飛

寂寞旅魂招不歸秦嘉鏡有前時結韓壽香消故篋衣
山城少人江水碧斷雁哀鴻秋雨夕朱絃已絕為知音
雲鬢未秋私自惜舉目風烟非舊時夢尋歸路多參差
如何將此千行淚更灑瀟湘斑竹枝

與劉蘇州書

白居易

夢得閣下前者枉札數幅兼惠答憶春草報白居易下
五十六章發函披文而後喜可知也又覆視書中有攘
臂痛拳之戲笑與抃會甚樂甚樂誰復知之因有所云

續前言之戲耳試為留聽與閣下在長安時合所著詩
數百首題為劉白唱和集卷上下

事具集解中

去年冬夢得

由禮部中集賢學士遷蘇州刺史郎冰雪塞路自秦徂
吳僕方守三川得為東道主閣下為僕稅駕十五日朝
觴夕詠頗極平生之歡各賦數篇視草而別歲月易邁
行復周星一往一來忽又盈篋誠知老醜冗長為少年
者所嗤然吳苑洛城相去二千里捨此何以啟齒而
解頤哉嗟乎微之先我去矣詩敵之勍者非夢得而誰

前後相答彼此非一彼雖無虛可擊此亦非利不行但
止交綏未嘗失律然得售之句警策之篇多因彼唱此
和中得之他人未嘗能發也所以輒自愛重今復編而
次焉以附前集合前三卷題此卷為下遷前下為中命
曰劉白吳洛寄和卷自太和六年冬送夢得之任之作
始居易頓首

擬孫權答曹操書

蘇軾

權白孟德足下辱書開示禍福使之內殺子布外擒劉

備以自効書辭勤款若出至誠雖三尺童子亦昭然知利害所在矣然僕懷固陋敢略布之昔田橫齊之遺虜漢高祖釋鄆生之憾遣使海島謂橫來大者王小者侯獨能以力自判不肯以身辱於劉氏韓信以全齊之地束手於漢而不能死于牖下自古同功一體之人英雄豪傑之士世亂則藉以翦伐承平則理必猜疑與其受韓信之誅豈若死田橫之節也哉僕先將軍破虜遭漢陵夷董卓僭亂焚燒宗廟發掘陵寢故依袁術以舉義

師所指城邑響應天下思得董卓而食之不厭不幸此志未遂而無祿蚤世先兄伯符嗣命馳驅鋒鏑周旋江漢豈有他哉上以雪天子之恥下以畢先將軍之志耳不意袁術亦僭位號污辱義師又聞諸君各盜名字伯符提偏師進無所歸退無所守故資江東為之業耳不意有荆軻舞陽之變不以權不肖使統部曲以卒先臣之志僕受遺以來卧薪嘗膽感日月之逾邁而歎功名之不立上負先臣未報之忠下忝伯符知人之明且權先世

以德顯於吳權若效諸君有非常之志縱不蒙顯戮豈
不墮其家聲耶漢自桓靈以來上失其道政出多門宦
官之亂纔息董卓之禍復興催汜未誅袁劉割據天下
所恃惟權與公及劉備三人耳比聞卓已鯨鯢天子反
正僕意公當掃除餘孽同獎王室上助天子與宗廟社
稷之靈退守藩國無失春秋朝覲之節而足下乃有欺
孤之意欲挾天子以令諸侯妄引歷數陰構符命昔笑
王莽之愚今竊歎足下陷覆車也僕與公有婚姻之舊

加之同志相求然自聞求九錫納椒房不惟同志失望
天下甚藉藉也劉備雖然兵少然僕觀其為人雄才大
略寬而有容拙於攻取巧於馭人有漢高祖之餘風輔
以孔明未可量也且以忠義不替曩昔僕以為今海內
所望惟我二人耳僕之有張昭正如備之孔明左提右
挈以就大事國中文武之事盡以委之而見教殺昭與
備僕豈病狂也哉古諺有之輔車相依唇亡齒寒僕與
劉備寔有唇齒相須之勢足下所以不能取武昌又不

能到成都者吳蜀皆存也今足下使僕取蜀是欲滅吳也蜀亡吳亦隨之矣晉以垂棘屈產假道於虞以伐虢夫滅虢是所以取虞虞不知以故及禍足下意何以異此古人有言曰白首如新傾蓋如故言以身託人必擇所安孟德視僕豈惜此尺寸之土者哉特以公非所託故也荀文若與公共起艱危一旦勸公讓九錫意便憾卒使憂死矧僕與公有赤壁之隙雖復盡釋前憾然豈敢必公不食斯言乎今日歸朝一匹夫耳何能為哉縱公

不見害交鋒兩陣之間所殺過當今其父兄弟寔在
公側怨讐多矣其能安乎季布數窘漢王及即位猶下
三族之令矧足下記人之過忘人之功不肯忘文若于
九錫其肯赦僕乎赤壁乎孔文舉與楊德祖海內奇士足
下殺之如皁隸豈復有愛於權天下之才在公右者即
害之矣一失江東豈復悔耶甘言重幣幸勿復再

報韓維書

蘇舜欽

蒙責以兄弟在京師不以義相就獨羈外數千里自取

愁苦予豈無親戚之情會合之樂安肯舍安逸而甘愁苦哉昨在京師不敢犯人顏色不敢議論時事隨衆上下心志蟠屈固亦極矣不幸適在嫌疑之地不能決然早自引去致不測之禍猝下吏人無敢言共起謗議被廢之後喧然未已更欲寘之死地然後為快來者往往鉤摘言語欲以傳播故閉戶不敢見如避兵寇偷俗如此安可久居其間遂超然遠舉羈泊於江湖之上不惟衣食之累實亦少避機阱也况血屬之多資入之薄常

相團聚可乏衣食乎不可也可閉關常不與人接乎不可也與之言必與之還往人人皆如持國則可不逮持國者必加釀惡言喧播上下使僕不能自明則前日之事未為重也即無此事亦終日勞苦應接之不暇寒暑奔走塵土泥淖中不能了人事羸馬餓僕日栖栖取辱於都城使人指背譏笑哀憫亦何顏面安得不謂之愁苦哉此雖與弟兄親戚相遠而伏臘稍足居室稍寬無終日應接奔走之勞耳目清曠不設機關以待人心安

間四體舒放三商而眠高春而起靜院明窓之下羅列
圖史琴尊以自愉悅有興則泛小舟出盤閭二門吟嘯
覽古江山之間渚茶野釀足以消憂尊鱸稻蟹足以適
口又多高僧隱士佛廟道觀家有園林珍花奇石曲池
高臺魚鳥之留連不覺日暮孔子作春秋而夷吳又曰
吾欲居九夷觀今之風俗樂善好事知予守道好學皆
欣然願來過從不以罪人相遇雖孔子復生是亦必欲
居此也以彼此較之孰為然哉人生內有自得外有所

適固亦樂矣何必高位厚祿役人以自奉養然後為樂
今雖僑此亦如仕宦南北安可與親戚常守耶予窘迫
勢不得如持國意必使我尸轉溝洫肉餒豺虎而後以
為安於義何其忍耶詩曰凡今之人莫如兄弟謂兄弟
以恩急難必極相救後章曰喪亂既平既安且寧雖有
兄弟不如友生謂友朋尚義安寧之時以禮義相琢磨
予持國外兄弟也急難不相救又於其安寧之際欲以
義相琢磨雖古人所不能受予欲不報乃外吾持國也

太祖皇帝圍姑蘇諭張士誠書

蓋聞成湯放桀武王伐紂漢祖滅秦歷代帝王之興兵
勢相加乃為常事當王莽之亡隋之失國豪傑乘時蜂
起圖王業據土地及其定也必歸于一天命所在豈容
紛然雖有智者事業弗成亦當革心畏天順民以全身
保族若漢之竇融宋之錢俶是也自古皆然非今獨異
爾能順附其福有餘毋為困守孤城危其兵民自取滅
亡為天下笑

太祖征張士誠下令

王者征伐應天順人所以平禍亂而安生民也張士誠
假元之命叛服不常天將假手於我是用行師以致天
討況士誠啟釁多端襲我安豐寇我諸金連兵構禍罪
不可逭今命大軍致討止於罪首在彼軍民無恐無畏
無亡逃竄無廢農業已敕大將軍約束官軍無致擄掠
違者以軍律論罪布告中外體予至懷

伐張士誠諭士民榜

伐罪救民王者之師考之往古世代昭然軒轅氏誅蚩尤殷湯征葛伯文王伐崇侯聖王之起兵也非富天下本為救民近觀有元之末主居深宮臣操威福官以賄成罪以情免風憲舉親而覈讐有司差貧而賣富廟堂不以為慮方參冗官又改鈔法役四十萬人湮塞黃河死者枕藉於道哀苦聲聞於天致使愚民誤中妖術不解倡言之妄誕酷信彌勒之真有冀其治以甦其苦聚為燒香之黨根據汝潁蔓延河洛妖言既行凶謀遂逞

焚蕩城郭殺戮士夫荼毒生靈無端萬狀元以天下錢糧兵馬而討之略無功效愈見猖獗然而終不能濟世安民是以有志之士旁觀熟慮或假元氏為名或托鄉軍之號或以孤兵獨立皆欲自為由是天下土崩瓦解予本濠梁之民初列行伍漸至提兵灼見妖言終不能成事又度元運難與成功遂領兵渡江賴天地祖宗之靈及將帥之力一鼓而有江左再戰而定浙東陳氏稱號據我上游爰興問罪之師彭蠡交兵元惡授首其父

子兄弟面縛與觀既待以不死又封以韓爵將相皆置
於朝班民庶各安於田里荆襄湖廣盡入版圖雖德未
及而政令頗修惟茲姑蘇張士誠為民則私販鹽貨行
劫於江湖兵興則收聚凶徒負固於海島其罪一也又
恐海隅一區難抗天下全勢詐降于元坑其參政趙璉
囚其待制孫撫其罪二也厥後掩襲浙西兵不滿萬數
地不足千里僭號改元其罪三也初寇我邊一戰而生
擒其親弟再犯浙省揚矛直擣于近郊首尾畏縮乃又

詐降於元其罪四也占據江浙錢糧十年不貢其罪五也陽受元朝之詔陰行假王之令挾制達丞相謀害楊左相其罪六也知元綱已墜公然害其江浙丞相達實特穆爾南臺大夫布哈特穆爾其罪七也誘我叛將劫我邊民其罪八也凡此八罪有甚於蚩尤葛伯崇侯雖堯舜禹湯文武與之同世亦所不容理宜征討以拯天下以濟斯民爰命中書左丞徐達率領馬步官軍舟師水陸並進攻取浙西諸處城池嘗戒軍士征討所到殲

厥巨魁脅從罔治凡我逋逃臣民被陷軍士咸宥其罪
其爾人民果能復業即我良民舊有房舍田土依額納
糧以供軍儲餘無科取使汝等永保鄉里以全家室此
興師之故也敢有千百相聚旅拒王師者即當移兵勦
滅遷徙宗族於五溪兩廣永離鄉土以禦邊鄙果有賢
哲或全城歸附或棄故來降予所賞賜非所敢吝凡予
之言信如皓日咨爾臣庶毋或自疑故榜

送丁謂序

王禹偁

主上躬耕之歲、僕自長洲宰被召由大理評事得右正
言分直東觀、既歲滿入西掖掌誥、且二年矣、今之舉進
士者、以文相售、歲數百人、朝請之餘、無不歷覽、有視其
命題而罷者、有讀數句而罷者、有終一篇而止者、或詩
可采而賦則無有也、或賦可稱而文則無有也、能全之
者、百不四五、況著書立言之士乎、去年得富春孫何文
數十篇、格高意遠、大得經旨、僕因詢諸同列、或曰、有遼
陽者、何之同志也、其文與何不相上下、僕未之信也、會

有以謂之文示僕視之則前言不誣矣是秋何來訪僕
既與之交又得謂之履行甚悉且喜其惠顧今春謂來
示以新文并律詩與賦向所號進士者皆莫能及也其
詩效杜子美深入其奧其文則皆意不常而語不俗若
雜于韓柳集中使能文之士不能辨也自是人爭願識
其面而交其心矣翰林賈公尤加歎服是知道之尊人
也豈位也乎學之富人也豈賢也乎哉今之不勤於道
不力於學而望人知者宜視丁氏子之道何如哉值其

歸贈以序

送貢公守平江序

王禕

上在位二十有三載寤寐治道圖修太平重念天下黎元比歲失職興師討罪久無成功乃更登庸舊臣屬以政柄於是綱紀薦飭衆正並進始擢南士有時望者為各道廉訪使而吾宣城貢公被命莅閩中居無何遽召為禮部尚書而廷議以平江缺守任難其人俄復用公守平江或者以謂憲使膺耳目之司尚書處喉舌之地

其權位為最要而顧守於一郡於物論疑若有未愜者
祿竊以為不然今日郡守之選重矣而平江為江南大
郡其守視他郡為尤重以故朝廷恒選剛嚴碩博之材
諳人情而卹民隱者托之以郡寄所以尊大藩重外庸
也惟公以文儒名家士林之冠冕歷官中外所至績輒
暴著頃曾為都水營田使實治平江其民之利病蓋所
稔知朝廷視邦選侯其用公為守也固宜公之宏材無
施不可亦奚彼此之計乎嗚呼惟我祖宗統一宇內百

年於茲重熙累洽式臻承平四方無虞烟火萬里可謂
盛矣夫何四三年間海內鼎沸河之南北淮之東西戎
馬蹂躪已無完區大江以南列城殘毀生靈塗炭亦靡
有息肩之所世故之艱難於是殆有不忍言者幸而平
江以地利人和之故隱然為南方之保障然餽餉之給
比諸郡率十七八百需供億萬計而其民亦已不勝夫
凋瘵今公為郡以父母其民寧不有以輯綏撫摩之以
阜其財以結其心乎嗟乎財者民之心也不取諸民無

以給國用取之無藝無以得民心品調消息之間公得無有術哉是故一城之完朝廷免一城之憂一民之安國家賴一民之力公也任郡寄之重上體宵旰思治之勤而布宣其及下之仁不久政成天子且亟用之當大任矣邇者濟南韓公鏞守鄱陽南陽成公遵守武昌皆即其官召入參預大政庶幾漢世郡守入為三公之意朝廷今日之用公意在此豈非天下士大夫之所望者乎顧禕草澤之人而有當世之志於公之行因區區一

言之公平日知禕為最厚將以其言為不佞矣

贈蕭教諭赴長洲序

王直

蕭氏吾邑故家詩書相傳也久矣而尤以篤義重鄉邑
洪武中鵬舉先生舉賢良太祖皇帝命賦指佞草應口
成詩上大喜授蘇州府同知以寬厚清慎得名再任山
東鹽運副使潔廉之操老而彌勵至今人能道之彥清
其孫也彥清名譽以書經領薦今年會試禮部復中教
官選得長洲教諭彥清勤學攻文足以得志於有司其

試禮部予實典文衡局以科額於是失彥清予與蕭氏
有世好意甚惜之而彥清不以望予雖然予固惜失之
而喜長洲之得也夫彥偉之才所在有之而不能不賴
於師師弟子之所由成也辟若制器然以良才遇良工
加之以規矩準繩而後方圓平直規矩準繩之不加欲
器之方圓平直蓋難矣故雖有材而不得成器以適於
用者不遇此也今之士孰無可用之心哉其材有大小
之不同而無不可用然所以成之皆於師乎望也因其

才而篤焉匡直輔翼而振德之則才既成矣以是而為
世用此治功之所以盛也然而遇良師者固有矣其不
遇者蓋多焉不遇則無以成其才猶未為病也苟遇而
弗良師之以不正之習而加之以非道之施中才之士
隨而變焉豈非學校之不幸哉長洲蘇之望縣其地多
良才今其未仕達者日望于成者不少其前所遇之幸
不幸予不能知今而得彥清予知其為幸也彥清之學
得於家講於師友皆聖賢之法言仁義之達道率是而

教之為弟子者勉而學焉其才將無不成予故為長洲
喜也彥清克篤於是邦人父老必推本於同知公之賢
而誦公之德不衰是彥清能成其祖之名亦所以為教
也彥清勉之因書以贈其行

送太守況侯述職詩叙

徐有貞

大丈夫將有為於斯世必先養其氣節氣節之固則其
中浩然以直遇事而不餒介然以正臨變而不敫不餒
不敫而後可以任天下之至重處天下之至難矣彼平

居悻悻自好恃能舞智以為天下之事無不可為及事
變之來無以自守而輒餒以敎者以氣節之素失其養
也然欲養其氣節必其天資之高脩學之勤而後有以
致之若吾蘇守況公其庶幾乎侯豫章人也才彊識明
胸次磊落而熟聞乎道義故能毅然以正自立而顯於
世其為郎禮部已有偉望時宣宗皇帝在御以天下郡
守多不得人命舉廷臣之才堪寄者得九人焉特賜璽
書諭勉以行蓋國朝郡守之賜璽書始此而侯以大宗

伯胡公之舉實居九人者之首故命之守蘇蘇畿內重郡也糧賦居天下之半國用所需多於蘇焉取之土產有餘而民力不足汙吏奸豪攸攘其間故雖有富庶之號民常苦於他郡而為之守者亦難於他郡侯既拜命即以興利除害為已任及下車脩政條明禁令一以璽書從事黜汙吏檢奸豪奏減糧額之重者十之三凡諸不便於民者悉陳革之蘇之人始則畏侯之威終則懷侯之惠而樂其利如出幽而明既病而甦也侯去郡者

再民輒上書乞留於今七年矣治久而化孚侯坐而撫之民無不順者故論者皆曰自國初以來有功於吾郡未有如侯之多者且謂侯有行必達有言必達可謂有大丈夫之為者余曰此侯之有為人固知之而不知侯之氣節所在也異時謁者專使於外秉威據重以誅求乎民方岳旬宣之臣皆向風而靡部使者亦斂手避焉郡縣奉承不暇冀免督責於已遑恤其民乎所在有二輩輒騷然失寧而蘇之聚者常三四十輩以其富庶

也誅求常倍於他郡侯之至獨挺然以義折之使皆俛首去不得肆乎其害而彼之魁傑者且服公所為謂其人曰況太守清政人也不可犯焉是以朝廷嘉侯之忠而吏民賴侯之德當是時候之氣節蓋已雄於天下矣余嘗一見侯與論大丈夫之事業侯固欣然以為得其志而余亦以是與之也雖然侯之為郡守亦重且難矣然天下之事尚有重且難於此者以侯當之而不餒以敘是則余之所望於侯者也惟侯勉之侯以述職赴京

師郡之薦紳會餞侯吳門之外各賦詩一章以為侯贈
時余適預焉因衆所彊而序以弁云

送太守況公述職序

太守況公之述職將行也郡之大夫士舉餞送焉而為
之詩文以稱道其德義余系於郡人之末禮不可以獨
已亦既有贈矣而醫學正科盛侃又屬言贈之余嘆曰
太守公政績之美信有足稱道矣然吾郡能言之士十
百其人極口之辭殫筆之力稱而道之固已無遺矣使

余能言且無以加矧其不能乎敢讓於能者侃曰不然夫美功頌德詩人之業也屬辭比事春秋之法也子名在詞垣而任官吏局其於敘述固所當然今郡有賢太守如況公者雖屢書焉不為過也子奚辭焉余偏於侃言而領之然余竊以古之君子之樂贈人以言也不徒美其所已能尤必贊其所未至故聖如大禹而益猶贊之今諸君之稱美於公盛矣而未有贊其所為者何耶夫以公之所自立而觀其志蓋不止於今日之所見而

吾黨之士所為稱說乃止而弗進豈忠告于公者哉昔黃霸治郡常為天下第一後為丞相乃無所建明而功名損於前時韓休亦善治郡以恬和易之及既當國則直道匡君有良相風蓋大臣之道與為郡異霸明於治民而懵於丞弼若休則可為兼矣故漢書傳霸循吏而唐書叙休之相業有以也公之高才達識其必有見於此者使其果進而大任尚願宜以霸之所不足者自克以休之有為者自勉可也夫有而不自足者必成其大

行而不自止者必至於遠古之君子惟日孜孜求進乎
道恒若弗及用圖其遠大之功業而已余不敏亦常有
志於斯故喜為公道也公於是而加孜孜焉以求其道
則雖唐虞三代岳牧卿尹之功業皆有可致又何韓休
之不可及哉遂以是言復于侃而為公贈

答況太守問芝草書

正統戊午年九月十日太守閣下今月初三日承專使
親札來慰于墓廬且以靈芝事為問良感良愧某之所

以營葬于此者蓋以先人平生有鄉土之思而某為子
不肖不克奉承親志侍以還鄉不幸先人遘疾竟終于
京師不孝之愆無以自逭重惟宗祀在身不敢即死所
不忍寔於客土扶柩歸葬庶幾追承先志之萬一以自
逭耳豈有纖毫孝行之足言哉既幸克安厝因廬墓所
終喪期亦固當爾豈敢沽名釣譽以自附於古人者哉
廼者墳堂之上偶生異草三五莖山中人輒相聚觀識
其是靈芝闕然以為祥瑞某即時明以戒止使勿造妖

捏怪豈意好事者遂乃傳說入城府以誤閣下之聽耶
閣下以聰明正直聞且嘗為禮官所識見遠矣山野鄙
人訛言入城正賴閣下約止之奈何從而聽之顧以靈
物異事為耶某雖不肖少頗讀數行書常恐隳於匪人
之域今者不死方圖自立以為報親之地使天下後世
不謂其為不孝子幸矣豈敢復隨人造作以自玷耶夫
山中之草百數有之自非神農莫能盡識今此草之生
某既不能別識亦不敢承誤公又何庸問之願早約止

勿復言至幸至幸某固愚蠢者且方在哀疚不文不次
惟閣下諒察

己未春正月再復書

某稽顙拜復太守閣下年前承問芝草事既以明白回
復今者復蒙教札略其蠢愚顧加獎慰且援引古今的
然以為孝徵瑞事至欲枉駕臨視某固知感盛德然憂
懼滋甚欲即詣府白止之緣在禪服誼不可入公門故
不免復覩縷蓋尚古之世物無所謂祥瑞者若夫古今

瑞圖之載皆漢世以來謬儒傳會之言也六經豈有是哉經中之言禎祥者蓋不過吉善之徵云耳某竊有見于此素不信之故平日於文辭恥及祥瑞事今者不幸而遠葬吾親獨廬于此又不意而有此草生于墳所而致人之訛言紛紛如此也然百草皆山之生也誠亦無怪其生者此山本名青芝豈非素生此草乎其何足為異某既以此曉于山林之人矣但其人好事甚又欲承奉賢府主意遂以為素未嘗見此草生就使果非素生

亦何必為異山中之物生于山中固其所也不足喜也
若其生于人之家庭則非其所矣吾且以為妖而惡之
拔而去之矣今乃在山而又當堂封之上所不敢除故
遂置而不問豈意人之好怪乃至喧傳以誤閣下之聽
如此耶然某竊惟閣下賢明固非可惑者也意者其將
振起風化故假此等事以為人人之勸哉然于他人則
可以承命于某則不敢何者已既不以為異而順人以
為異已則惡他人之造妖捏怪而復順之其過有加焉

苟以為孝之為徵則所不敢者人豈不自知如某者方
惴惴懼以不孝而見譴于天又何以徵乎乃徵諸天是
誣天也況此草固地之所生者豈某致之生耶若指地
之所生以為已徵是誣地也某雖不肖平生所學不過
一誠耳方切切自勉以誠而不足安敢以誣天地乎或
者又云閣下之意將以聞于朝廷朝廷又豈可誣哉某
固不才無可用於朝廷然區區之心未嘗不以樸忠自
勵者而乃使之為誣此又不敢之不敢者也太守一郡

師表凡一舉動庶民趨之倘枉駕遠臨則必闔郡響動
得不大為驚怪耶此又不可之不可者也如將舉之則
某有逃遁而已必不能從烏哀疚之餘不事筆札為閣
下所迫忍苦告誠閣下鑒之亮之恕其蠢而與其誠不
勝哀感之至

送葉元圭知吳縣詩序

永嘉葉君元圭初以名進士選為庶吉士詔比二十八
宿績學翰林五年而出為蘇州之吳江縣令至官期月

而民大治以母憂去今年起復赴京師得調于吳凡朝
之賢士大夫之知君者咸以君之才行學識之茂宜列
之朝著贊經綸司風化以大其用而弘其施乃處之一
邑且久于外莫不咨嗟以惜之惟吳之人士聞之則私
幸於得賢而為之興忭以相慶若余之意則又兼處乎
二者之間焉蓋予與葉君以聯科進士選入翰林同研
席者衆年斯文相契之情若兄弟然其為吳江也余送
之行既而各以家艱去官不相見者閱五寒暑矣今余

自吳之墓廬起復而來適與君會方思與之叙契濶展
懷抱而君復有是行夫知之深者期之重余寧不惜君之
去然君之所治余父母之邦也君去而大惠吾民又寧
不為之私喜耶且吳為泰伯過化之地而子游氏之所
生也其民風素厚士習素正而又素為富庶東南財賦
所出吳得十二焉然比歲以來民風寢變而澆薄士習
寢流而卑陋而向所謂富庶者亦寢以凋敝寔去而名
存究其所以致然者固有由來矣其將振起而復之者

獨不在于賢守令乎夫欲民風之厚必本之仁化欲士習之正必先之德教若其富則必由乎安養之闕而致之然長民者恒急於賦役而緩于教化故卒患其未能復也今幸得賢令如葉君其有所望而振起之矣昔子游以絃歌而治武城固曰君子學道則愛人君之學于道也有素果能推愛人之道而極其至雖天下之大可治而況為縣哉君行有日在朝所與同選諸君子相率賦詩送之而推予序其簡首

送長洲丞邵君宏啟序

古之人所重者父母之邦而邦大夫尤所加敬焉孔子曰居是邦不非其大夫又曰居是邦事其大夫之賢者夫有可非者未必賢也未必賢者且不非之則其賢者固在所當事矣然此特所居之邦爾非父母之邦也于所居之邦且然況父母之邦乎其禮固宜又加重焉耳矣長洲余父母之邦也凡官于是者皆余之所當敬也況其賢而愛民者哉賢而愛民者雖不吾識固亦吾之

所當加敬況其賢而又有斯文交親之分者哉此予之於邵君所為眷眷而不忘者也君名昕字宏啟越之餘姚人也其從兄脩撰君宏譽實余同官之良而相知之深者初君之以文學才行舉而來也余數會之脩撰君所觀其儀止而聽其談吐固已知其所存之厚矣及余丁艱歸吳君適為丞于長洲其持已也廉其事上也恭其處寮窠也和其馭吏也明而臨民也惠至於儒紳之士有可言者又必待之以禮焉由是上下之人翕然稱

之皆以為賢余聞之良以為鄉邦斯文之休君亦以迺
兄之好數枉顧余山中然余以哀事故不及以復也今
年君以三載滿秩報治于朝詞林諸公以脩撰君之故
又聞其賢也莫不敬之而贈之以文章余其故可恕然
而已耶雖然余之敬君者豈以為謠哉所以為禮也以
禮敬人必有所忠告焉可也自今已往君其尚加懋哉
持已無數其明也撫民無數其惠也待士無數其禮也
夫如是則都高官而享厚祿當重任而臨大事將無往

而不可豈惟佐邑之為賢乎君其尚加勉

送劉原博序

草窓劉先生原博余之斯文交也原博之先世以醫名
繇宋暨元代有顯者在國朝則故良醫公彥敬院判公
士賓相繼以醫國手擅聲于天下原博實良醫公之孫
而院判公之子也然原博之學不專于醫自吾儒經世
之學書以及諸子百氏之言靡不讀讀之靡不探其賾
而鈎其深其于辨析物理議古論今縷縷其弗絕疊疊

其不厭也至發為文章蒼然古色有作者之風焉原博
初舉賢良或尼之而止繼以文學舉又尼而止卒以醫
舉為惠民局官乃始得之知原博者咸以為原博以母
夫人高年在鄉陳情乞歸省覲既得請而治行其與原
博同官及所從游之士謁余謀所以贈之者予曰嗟乎
以原博而官于醫有不足為者矣余其奚贈哉雖然原
博之志殆不止乎醫而已也余輩之所以知原博期待
原博者亦不止乎醫而已也原博固儒者也儒者之事

在學與行之修焉耳學不足以明道不足以為學行不足以經德不足以為行學行之備則以之達焉而可以之窮焉而可以之近焉而可以之遠焉而可達以施之天下窮以守之一身近以行之當時遠以傳之後世余也謬以儒名竊有志乎此久矣然質魯而才下無以副斯志者故願與原博言之幸其有以相發而進我於道焉若夫醫師濟生之術原博固不求聞于余余亦無以告之原博至於寧靜致遠之道敬恭桑梓之禮又原博

之所素敷焉者其待予言哉其待予言哉

吳都文粹續集卷四十六